

مش بالساهل

مش بالساهل كده هتاخدني
لازم من نفسي تخطفني
لازم بكلامك تسحرني
وبكل كياني تأسّرني

لازم .. أسهر بيك مشغولة
ولا لحظة انساك كده بسهولة
ألقاك حاجة مش معقولة
واحد غير كل الي قابلني

لازم .. أفضل ليك مشدودة
وابقى بوجودك موجودة
ومشاعري ليك مش محدودة
حاجة أكبر مني بتدفعني

لازم تتعذّب في فراقك
توصّف ليّا نار أشواقك
تنادينني صباحك و مساءك
على بابي دائماً مستنّي

لازم ادوق عطفك و حنانك
و تورّيني بردو جنانك
تزرعني وردة ف بستانك
وايديك تُحضني و تقطّفي

لازم لو هزعل .. تراضيني
ما تأخرش .. أوام و تحييني
و بأيّ طريقة تخلّيني ..
أرضى و اسمحلك تصالحني

لازم لَمَّا اسْكُت .. تتكلم
وتعدّي عليّ وتسلم
وتلاحظ بردو وتتعلم
إزّاي من لمحّة .. تفهمني

يمكن علشان انا أمّورة
عايزة حبيبي يملا الصورة
إوعى لتحسبني مغرورة
مش كده خالص .. لو تعرفني.